

& ne se mesloient à la dance que par interualle à cause qu'ils estoient destinez à autre chose.

Je vis un iour un de ces bouffons entrer processionnellement dans la cabane où se deuoit faire la dance, avec tous ceux qui estoient de la feste, lequel portant sur ses espauls, un grand chien lié & garotté par les iambes, & le museau, le prit par celles de derriere, & le rua tant || de fois contre terre qu'il en mourut, estant mort il l'enuoya apprestre à la cabane voisine pour le festin qui se deuoit faire à l'issuë de la dance. 308

Que cela ayt esté fait sans dessein ou pour un sacrifice, ie n'en ay rien sceu, car personne ne m'en pû donner l'explication.

Si la dance est ordonnée pour une malade, à la troisieme ou derniere après disnée, s'il est trouué expedient, ou ordonné par Loki, elle y est portée, & en l'une des reprises, ou tour de chanson, on la porte, en la seconde on la fait un peu marcher & dancer, la soustenant par sous les bras : & à la troisieme, si la force luy peut permettre, ils la font un peu dancer d'elle mesme, sans ayde de personne, luy criant cependant tousiours à pleine teste : Etsagon outfahonne achietequ anatetsence ; c'est à dire, prend courage femme, & tu feras demain guerie, & après les dances finies, ceux qui sont destinez pour le festin y vont, & les autres s'en retournent en leurs maisons.

Il se fit un iour une dance de tous les ieunes hommes, femmes, & filles toutes nuës en la presence d'une malade, à laquelle il fallut (traict que ie scay comment excuser ou passer sous silence) qu'un de ces ieunes hommes luy pissast dans la bouche, & qu'elle auallast